

li vî tchèt èt l' djon.ne soris.

One pitite djon.ne soris qui l's-ôtes lomint " Mayane ",
Aveut bin tot pèsé, compté èt rèflèchi ;
On côp qu' t'as dècidé, i t' faut, piyane-miyane,
Bin mostrer qu' t'as crèchu, èt l' trossî foû do nid !
Èle n'aveut nin tûzé qu'on trove co bin su l' vôte
Qui lès soris chûvenut, tofêr è s' porminant,
One bièsse, qu'on lî a dit : « Quand tè l' vès, cour èvôye !
Li tchèt è-st-à l'awaîte, minme s'i fait l' sodwârmant. »
Faleut qu' ça ariviche ! Èle n'a nin fait dîs mètes
Qu'èle si trove, buk à buk, avou on vî marou :
« Minme si c'est vos l' pus fwârt, què frîz d'ôte qui d'admète
Qu'au r'gârd di nos, por vos, l' maujo, c'è-st-on fastrou.
Tos lès djoûs, è v' lèvant, vos r'trovez vosse gamèle ;
Maugré lès pris qu' ça cosse, on vos l' rimplit à fait,
Dismètant qu'one soris, por on p'tit grin qui t' pèles,
On t' fout l' tchèt à tès trouses ! Faut veûy come i s' fait laîd.
Dji su mwinre à fé braîre, co pus sètche qui brokète !
Rûsé come vos l'èstoz, vaureut mia m' sipaurgnî ;
Purdoz pacyince deûs mwès ! Là, dji sèrè fine prète
Po vos-èfants qu'auront one saqwè à mougîn. »
Èlle èsteut sûre di s' côp, tot djouwant l' comèdiye.
« – Vos vos disfindoz bin, on paurî n' freut nin mia !
Tot bon juje vos dîrè qu'i faut qu'on s' dimèfyè,
Qui l' mèyeû dès jujemints, c'èst nin todi l' pus bia.
Si dj' vos laîreu tranquile, vos n' sondjerîz pus qu'one sôte,
Dji v's-ètind ariver avou vos gros chabots :
Vos chorrîz raddimint po-z-aler prévenu l's-ôtes,
Èt m' fé passer d'avant zèles por on pôve vî bèrjot.
L'èspéryince m'a apris, mins ça n' vint qu'avou l'âdje,
Qu'i n' faut nin r'mète à d'mwin ç' qu'on pout fé audjoûrdu.
Mès-èfants savenut bin qui, tant qu'i sèront sâdjès,
Li maujo l'zî dôrè tot ç' qu'i faut, èt co d'pus. »
I n' vout pus balziner, i lî faut fé s' bèsogne !
Nin tant pace qu'il a fwim, mins il èst bin payî ;
Gn-a rin qu' lî va pus lon qui d' veûy si maîsse qui grogne ;
S' i rapwate one soris, c'èst po s' fé carèssî.

Lès djon.nes tûzenut tofêr qui leû fôrtune èst faîte ;
Qui tot ç' qu'on tchôke è s' tièsse vint au cu sins bouter.
Dismètant qu'on pus vî prètcherè : « Mi, dji sowaîte
Qui tot ç' qui v' ramasseroz, vos l'auroz mèrité. ».
I-gn-a co rin d' mèyeû qui d'apèter s'-t-ovradje :
One bèsogne qu'èst bin faîte, c'èst l' prumî dès payemints.
Di ç' manôye là, qu' c'èst l' pris d'one brèssîye di coradje,
Gn-aure nin one mastoke po nosse gouvèrnèmint !

Albert Delvaux

Mayane : naïve

Fastrou : fauteuil, ici bien-être

Paurî : avocat

Bèrjot : lourdaud

Apèter : apprécier hautement